

四庫全書薈要

• 乾隆御覽本

集部

石湖詩集卷十八

宋 范成大 撰

初發太城留別田父

西蜀夏旱未行前數日連得雨父老云今歲又熟矣

秋苗五月未入土行人欲行心更苦
路逢田翁有好語競說宿來三尺雨
行人雖去亦伸眉翁皆好住莫相思
流渠湯湯聲滿野今年醉飽雞豚社

入崇寧界

桑間三宿尚回頭何況三年濯錦遊
草草郾筵中酒處不知身已在彭州

懷古亭

在永康離堆之上離堆分岷江水一派
溉彭蜀而支流道郾縣以入於府江

朝來寫得故人書雙鯉難尋鴈亦無
付與離堆江水去

解從郾縣到成都

離堆行

沿江有兩崖中斷相傳秦李太守鑿此以
分江水又傳李鎖鑿龍於潭中今有伏龍

觀於潭上蜀旱支江水涸即遣官致祭壅都江
水以自足謂之攝水無不應民祭賽者率以羊

歲殺四
五萬計

殘山狼石雙虎卧斧迹鱗皴中鑿破潭淵油油無敢唾
下有猛龍踰鐵鎖自從分流注石門西州秔稻如黃雲
剗羊五萬大作社春秋伐鼓蒼煙根我昔官稱勸農使
年年來激西江水成都火米不論錢絲管相隨看蠶市
款門得得酹清尊椒漿桂酒刪羶葷欲妄一語神豈聞
更願愛羊如愛人

崇德廟

李太守廟
食處也

雪山南風融雪汁化作岷江江水來不知新漲高幾畫

離堆石壁舊有水則記漲
痕占歲事一畫為一則

但覺樓前奔萬雷天教此水

入中國兩山辟易分道開我家長川到海處却在發源
傳酒杯人生幾履辨此役遠遊如許神應咍東歸短棹
昨已具明日發船撾鼓催灘平放溜日千里已夢鱸
如雪堆丹楓繫纜一回首玉壘浮雲安在哉

戲題索橋

織簞勻鋪面排繩强架空染人高曬帛獵戶遠張罾薄
薄難承雨翻翻不受風何時將蜀客東下看垂虹

青城山會慶建福宮

宮舊名丈人觀予為請於朝賜今名入山前數日勅書至

自行在予就設醮以祝聖人壽云

墨詔東來洵驛傳璇題金榜照山川祥開聖代千秋節
響動仙都九室天觸石湧雲埋紫邏流金飛火燭蒼巔

祇應老宅龐眉客長記新宮錫號年

老宅即老人村也舊名潦澤疑傳之

誤余為更此名

再題青城山

萬里清遊不暇慵雙旌換得一枝筇來從井絡直西路

上到江源第一峯海內間身輸我佚山中佳氣為人濃
題詩試刻巖前石付與他年蘚暈重

玉華樓夜醺

青城觀殿前大樓制作瑰麗初夜有火炬出殿後峯上羽衣云數年前曾

一現已而如有風吹滅之比同行諸官至則無見矣予默禱云此燈果為我來者當再明使衆共觀之語訖復現

丈人峯前山四周中有五城十二樓玉華仙宮居上頭
紫雲瀕洞千柱浮剛風八面寒飈颺靈君宴坐三千秋
躋符飛行戲元洲下睨濁世悲蜉蝣桂旗偃蹇澹少休

知我萬里遙相投暗蛭奏樂鏘鳴球浮黎空歌清夜道
參旗如虹歛下流化為神燈燭巖幽火鈴洞赤凌空旂
誰歟蔽虧黯然收禱之復然為我留半生縛塵鷹在韝
豈有骨相肩浮丘山英發光洗羈愁行迷未遠夫何尤
笙簫上雲神欲遊揖我從之騁素虬

上清宮

歷井捫參與未闌丹梯通處更躋攀冥濛蜀道一雲氣
破碎岷山千髻鬟但覺星辰垂地上不知風雨滿人間

蝸牛兩角猶如夢更說紛紛觸與蠻

最高峯望雪山

大面峯頭六月寒神燈收罷曉雲班
浮空忽湧三銀闕云是西天雪嶺山

范氏莊園

夕陽塵土漲郊墟六六峯頭夢覺餘
竹色喚人來下馬亂蟬深處有圖書

青城縣何子方使君同年園池

橙塍芋隴意中行浩蕩薰風不記程
雨腳背人歸玉壘
江聲隨馬入青城五橋今日新知路
千佛當年舊綴名
水竹光中同一笑
丐君荷露濯塵纓

何同年書院

有丹竈
甚雅

竹色侵晚帙泉聲漱嵌根
試通丹竈路應到老人村

江源縣張季長正字家善頌堂

季長畫出先世所
藏圖書壁有趙清

獻公為令時題名是日食新米
坐中皆贊喜夏初嘗大旱也

我窮江源來名勝頗追逐
薰風秀沃野在處得奇矚
頌

堂有佳士文字照繡竹圖書抱世守古錦韜玉軸黃金
不滿贏故國有喬木逡巡酒如澠霍霍具水陸田頭新
穀升一飯香滿屋回思閔雨時敢望遽炊玉摩挲壁間
題明府遂州牧山高江水長百世照尸祝我來坐琴壇
琴壇在成都西園清
獻公彈琴宴坐處 醜汗媿前躅空餘烟霞痼未許是
公獨請歌青城遊或附耆舊錄

蜀州西湖

荷花正盛開水月登舟亭也湖陰亭外
別有白蓮尤奇蜀中無菱至此始見之

閒隨渠水來偶到湖光裏仍呼水月舟徑度雲錦地誰

云不解飲我已荷香醉湖陰玉嬋娟竄立紅妝外何須
東閣梅悠然自詩思驚風入午暑水竹有秋意米菱不
盈桮興與蓴鱸會遙知新津宿魂夢亦清麗

新津道中

雨後郊原淨村村各好音宿雲浮竹色清溜走槿陰曲
沼擎青蓋新畦藝綠針江天空濶處不受暑光侵

次韻陸務觀修新津遇雨不得登修覺山徑過

眉州三絕

新津館舍上漏下濕送客皆不堪憂修
覺一望人云可見劔門杜子美所謂西

川供客眼處眉山
城中悉是汙池

送客多情難語離
僕夫無情車載脂
平生飄泊知何限
少似新津風雨時

離合紛紛怕遠遊
遠遊仍怕賦登樓
何須一望三千里
望盡西州轉更愁

雨後驀頭山色開
玻璃江清已可杯
綠荷紅芰香四合
又入芙蓉城裏來

中巖

去眉州一程
詎羅尊者道場相傳
昔有天
台僧遇病僧與之木
鑰匙云異時至眉州中

巖扣石筍當再相見後果然今三石屹立如樓
觀前兩樓純紫石中一樓蘿蔓被之傍有寶瓶
峯甚端正山半有喚魚潭慈姥龍所居世傳鴈
蕩大小龍湫亦諾詎羅道場豈化人來往無常
處耶

赤巖倚竚竚翠邏森戍削岑蔚嵐氣重稀間暑光薄聊
尋大士處往扣洞門鑰雙撐紫玉闕中矗翠雲幄應供
華藏海歸坐寶樓閣無法可示人但見雨花落不知龍
湫勝何似魚潭樂夜深山四來人靜天一握驚看松桂
白月影到林壑門前六月江世界塵漠漠寶瓶有甘露

一滴洗煩濁捫天援斗杓請為諸君酌

慈姥巖與送客酌別風雨大至涼甚諸賢用中巖
韻各賦餞行詩紛然擘牋清飲終日雖無絲竹管
絃而情味有餘

山靈知我厭塵土喚起蟄雷鏖午暑松風無力雨絲長
散作毵毵雪塵舞巖前懸溜珠簾傾安得吹來添玉觥
詩成酒盡腸亦斷休喚佳人唱渭城

次韻陸務觀慈姥巖酌別二絕

送我彌旬未忍回可憐蕭索把離杯不辭更宿中巖下
投老餘年豈再來

明朝真是送人行從此關山隔故情道義不磨雙鯉在
蜀江流水貫吳城

次韻代答劉文潛司業二絕

平羌江上首空回慈姥巖前定把杯縱使石腸都忘却
也應風雨送愁來

回廊月下短歌行惟有知音解有情一曲紅窗聲裏怨

如今分作兩愁城

玻璃江一首戲效陸務觀作

玻璃江頭春淥深別時沄沄流到今祇言日遠易排遣
不道相思翻苦心烏頭可白我可去菖花易青君易尋
人生若未免離別不如碌碌無知音

余與陸務觀自聖政所分袂每別輒五年離合又
常以六月似有數者中巖送別至揮淚失聲留此
為贈

宦途流轉幾沈浮，雞黍何時共一丘。
動輒五年遙遠信，常於三伏話羈愁。
月生後夜天應老，淚落中巖水不流。
一語相開仍自解，除書聞已趣刀頭。

萬景樓

在漢嘉城中山上，登覽勝絕，殆冠西州。予
今畫工作圖，以歸山谷來遊時，但有安樂

園未有
此樓也

左披九頂雲，右送大峨月。
殘山剩水，不知數一一當樓。
供勝絕，玻瓈濯錦，遙相通指。
麾大渡來朝，宗川靈胥命。
各東去，我亦順流呼短篷。
詩無傑語，慚風物賴有丹青。

傳小筆仍添詩客倚闌看
令與山川相映發
龍彎歸路繞烏尤
棟雲簾雨邀人留
若為喚得涪翁起
題作西南第一樓

凌雲九頂

即大石佛處初登山時巖壁上悉剝為小佛不知其數山前佛頭灘受雅江之

衝最為艱險

聊為東坡載酒遊
萬龕迎我到峯頭
江搖九頂風雷過
雲抹三峨日夜浮
古佛臨流都坐斷
行人識路亦歸休
酣酣午枕眠方丈
一笑閒身始自由

戲題方響洞

漢嘉廣福院中水洞有聲琅然莫知其所在舊名丁東水山谷易今名且

題詩云古人名此丁東水自古丁東直至今我為改名方響洞要知山水有清音

隔凡冰澗不可越衆真微步壺中月徙倚含風玉珮聲
何須聽作菱賓鐵

問月堂酌別

半明燈火話悲酸此會情知後會難四海宦遊多聚散
一生情事足悲歡鬢絲今夜不多黑酒量徹明無數寬
醉夢登舟都不記但聞風雨滿江寒

別後寄題漢嘉月榭

陸務觀所作同年謂王子蒼萬景嘉州酒名湖亭明月湖

也在州治前方作旗亭月榭正直大峨取太白峨眉山月之語以名傍有一巖景趣尤佳子蒼

欲作樓未果

隱吏詩情卜築幽同年惜別勸淹留試傾萬景湖亭酒
來看半輪江月秋川路雖長猶共此夜船空載且歸休
碧巖勝處頻回首好事誰能更小樓

過燕渡望大峨有白氣如層樓拔起叢雲中

圍野千山暑氣昏大峨煙靄亦繽紛玉峯忽起三千丈

應是兜羅世界雲

蘇稽鎮客舍

送客都回我獨前
何人開此竹間軒
灘聲悲壯夜蟬咽
併入小窗供不眠

峨眉縣

縣出符文布婦女人人績麻且行且觀
田家束蒿然於門口為香氣以迎客

窮鄉未省識旌旄
雞犬歡呼巷陌騷
村媪聚觀行績布
野翁迎拜跼然蒿
泉清土沃稻芒蚤
縣古林深槐廕高
珍重里儒來獻頌
盛言千載此丘遭

初入大峨

煙霞沉痼不須醫此去真同汗漫期
曾款上清臨大面仍從太白問峨眉
山中緣法如今熟世上功名自古癡
賸作畫圖歸挂壁他年猶欲卧遊之

華巖寺

衆峯攢壁立中有路一綫攀援白雲梯
食頃已天半我本紫芝曲誤落青芻棧
向來脫新羈恍已還舊觀花煙辭少城
暑雪對大面來從太白西更走三峨徧
風生兩

腋輕泉吼四山眩今晨第一程莫歎興僕倦

中峯

有普賢閣背倚白崖峯餘七十峯共環之茂真尊者舊菴在峯下其傍一峯最秀號呼應

孫思邈所往來傳云茂真與孫常相呼而應故名

凌高躅危峯斗下瀕幽谷仙英馥椒蘭嘉蔭疊旒纛空
翠元不雨洩雲自膏沐暑綵森有稜瘁肌淒欲粟白崖
如負依金界莫蒼麓衆峯拱二八娟妙繞重屋真人與
尊者幽居接松竹呼之儻肯應留我試餐玉

雙溪

在白水寺前兩溪各有一山來齊出橋下前行入林數十步合為一水洄而深潭以入寶

現溪僧云此景猶在廬山三峽鴈蕩龍湫之上
溪中橋常有兩石子闕日照溪中常有五色光
相

冷風騷騷木葉低洞淵阻深生怪奇碧琳雙澗黑無底
中有玉龍相對飛雷轟雪捲入林樾化為一龍潭底沒
摩尼闢罷四山空時有寶光巖下發

寶現溪

雙溪合而一既出巖竇散為此溪唐三藏
自西域歸過溪見兩石子闕攬得其一今

藏黑水寺石上有一目
端正透底溪以此得名

梁梁罨畫沙鱗鱗麴塵水朝陽相發揮光景艷孔翠寧

聞雙溪號但見穀紋細神魚不謀食終日印潭底躍珠
本具眼聊共阿師戲收藏更傳寶一笑落第二

點心山

在白水寺後
自此登峯頂

入山窘宿雨上山賀朝霽跬步便歷險轉盼已呀氣豈
惟膝點心固已頭搶地遊人貪勝踐姑吟蜀道易

大扶桿

身如魚躍上長竿路似鏡中相對看珍重山丁扶我過
人間踽踽獨行難

小扶桿

食時方了大扶桿前逢仄徑仍崎嶇懸崖破棧不可玩
興丁挾我如騰狙平生行路險艱足如今雪鬢應難綠
却憐苔髮鎮長青千古珍珍挂高木

胡孫梯

峽山有胡孫
愁予常過之

木磴鱗鱗滑帶泥微生歎側寄枯藜胡孫愁處我猶過
箇裏如今幸有梯

雷洞平

七十二洞皆在道傍大旱有禱投香花不
應即以大石或死蟲及婦人敝履投而觸

之雷雨
即至

行人魄動風森森兩岸奔黑愁太陰不知七十二洞處
側足下窺雲海深聞有神龍依佛住根觸須臾召雷雨
兩川稻熟須好晴我亦閒遊神勿驚

八十四盤

冥鴻無伴鶴孤飛回首塵籠一笑嬉八十四盤新拄杖
萬三千乘舊牙旗石梯碧滑雲生後木葉紅斑雪霽時
說與同行莫惆悵人間捷徑轉欽巖

婆羅平

仙聖飛行此是家路逢真境但驚呀神農嘗外盡靈藥
天女散餘多異花嵐雨逼衣寒似鐵冰泉炊米硬於沙
峯頭事事殊塵世缺甃跳梁笑井蛙

思佛亭曉望

栗烈剛風刮病眸登臨何啻緩千憂界天暑雪青城外
湧地晴雲瓦屋頭浩蕩他年誇北客蒼茫何處認西州
千巖萬壑須尋徧身是江湖不繫舟

光相寺

峯頂四時如大冬
芳花芳草春自融
苔痕新晞六月雪
木勢舊偃千年風
雲物為人布世界
日輪同我行虛空
浮生元自有超脫
地上可憐悲撥蓬

七寶巖

大峨絕頂白水寺已在山半
由白水陡上至巖又六十里

天如碧玉甌下覆白玉盤
晶光眩相射我獨居兩間
正視不勝瞬却立聊少安
但覺風浩浩骨毛森以寒
神仙杳無處寧論有塵寰
身輕一槁葉兩腋如飛翰
同行挽

我衣何往何當還少留作詩去奇哉此憑闌

淳熙四年六月二十七日登大峨之巔一名勝峯
山佛書以為普賢大士所居連日光相大現賦詩
紀實屬印老刻之以為山中一重公案

勝峯高哉摩紫青白鹿導我登化城佳山大士喜客至
兜羅布界續相迎圓景明暉倚雲立艷如七寶莊嚴成
一光未定一光發中有墨像隨心生白毫從地插空碧
散燭象緯天龍驚夜神受記亦修供照世洞然千百燈

明朝銀界混一白咫尺眩轉寒凌兢天容野色儵開閉
慘澹變化愁仙靈人言六通欲大現洗山急雨如盆傾
重輪疊采印巖腹非煙非霧非丹青我與化人中共住
鏡光靚面交相呈前山忽湧大圓相日圍月暈浮青冥
林泉草木盡含裹是則名為普光明言詞海藏不勝讚
北峯復有金橋橫衆慈久立佛事竟一塵不起山玲峴
向來無法可宣說為問有耳如何聽我本三生同行願
隨緣一念猶相應此行且復印心地衣有寶珠奚外營

題詩說偈作公案亦使來者知吾曾神通佛法須判斷
一任熱碗春雷鳴

請佛閣晚望雪山數十峯如爛銀晃耀暑光中

累塊蒼然是九州大千起滅更悠悠雪光正照天西角
日影長浮雨上頭峯頂何曾知六月塵間想已別三秋
佛毫似欲留人住橫野金橋晚未收

淨光軒

白水寺

翳華銷盡八窗明雨竹風泉演妙聲身世只今高幾許

北峯渾共倚闌平

虎溪

黑水寺前雖不及雙溪亦佳處也開山僧至此斷渡一虎踞前因跨之亂流以濟今作橋

其上水歲推
盪輒更新之

水本無心作浪波經行偶與石相磨不須更問橋安否
喚取於菟載我過

白雲峽

牛心寺

雙溪疑從銀漢下我欲窮源問仙舍飛瀾濺沫漱藍輿
却望兩崖天一罅疎疎暑雨滑危梯策策山風掖高駕

幽尋險絕太奇生莫笑退之號太華

孫真人菴

何處仙翁舊隱居青蓮巉絕似蓬壺雲深未到淘朱洞
雨小先尋煉藥爐磴下草香疑可餌林間虎伏試教呼
閒身儘辦供薪水定肯分山一半無

龍門峽

插天千丈兩碧城中有玉塹穿巖扃瀑流懸布不知數
亂落嵌根飛白雨瑤琨為室雲為闔龍君所居朱夏寒

不辭擊棹更深入萬一龍驚雷破山

既離成都故人送者遠至漢嘉分袂其尤遠而相
及於峨眉之上者六人范季申郭中行楊商卿嗣
勳李良仲譚德稱口占此詩留別

我本住林屋風吹來錦城錦城亦何樂所樂多友生相
從不知久相送不計程橫絕峨眉巔欲去有餘情吾宗
蓋難弟李郭人中英二楊懿文德譚子資粹清相視心
莫逆劇談四筵輕明朝各回首雲水相與平我今投紱

去行且扶藜耕淒涼別知賦慷慨結客行後會豈不好
路長恐寒盟諸賢乃不凡骨相有功名大厦罩羣木明
廷朝萬靈王畿坦如砥結綬當同登道傍石湖水誰能
叩柴荆夢中儻相見秉燭聽殘更

聞威州諸羌退聽邊事已寧少城籌邊樓閣檻修
葺亦畢工作詩寄權制帥高子長

籌邊樓上美髯翁赤白囊飛笑語中勃律天西元米玉
蓬婆雪外昨分弓踏筵舞罷平關月橫梁詩成滿袖風

諸校各能歌破陣何須琴裏聽平戎

破陣平戎皆有本事子長當一笑領

石湖詩集卷十八

謹案卷十六第三頁前四行層巔多折木按宋詩
鈔折木作朽木義並通

第五頁前六行人家閭閻似渠稀刊本閭作伐據
宋詩改

第七頁前四行玉色幘顏不可干刊本幘訛顏據
宋詩改

第十六頁後四行邛邛驛大雨按邛邛漢書作什
方唐書作什邡並係通用宋書本別作邛邛者

誤

卷十七第一頁後六行試上東樓直北看按宋詩
鈔直作且今從本集

第六頁前二行誰把柔條夾砌栽按宋詩鈔柔條
作柔條係傳刻之訛今仍本集

第七頁前四行
欝心傾濃露刊本濃作穠據宋詩
改

第十頁後七行歸來更了程書債按宋詩程作塵

與此異

卷十八第三頁前六行余為更此名刊本名訛石
今改

第四頁前七行歷井捫參與未闌按宋詩鈔井作
月今從本集



總校官庶吉士臣侍朝
校對官編修臣閔惇大
騰錄舉人臣嚴儀

欽定四庫全書薈要

集部

石湖詩集卷

十九至
二十一

詳校官助教臣謝登雋



石湖詩集卷十九

宋 范成大 撰

東三 捷為江樓

河邊堵立看歸蓬三老開頭暮欲東漲水稠灘連峽內

淺山浮石似湘中無人驛路榛榛草有客江樓浩浩風

種落塵消少公事賸裁新語寄詩筒

縣令師永錫
同年能詩

宣化道中

瘦草蕭疎已似秋盤陀山骨束江流兩崖若不頑如鐵
爭得狂瀾拍岸休

將至敘州

亂山滿平野漲水豪大川仄徑無轍跡疎林有炊煙山
農旦燒畬蠻賈暑荷氎窮鄉足荒怪打鼓催我船

七夕至敘州登鎖江亭山谷謫居時屢登此亭有
詩四篇敬用其韻

水口故城丘隴平新亭乃有絙鐵橫

舊戎州在對江山
趾下臨馬湖蠻江

路蠻自江出必過城下故真鎖以為限今遷城過江已失形勝而猶於亭下鎖江特以欄稅而已非本旨也

歸艤擊汰若飛渡一雨徹明秋漲生東樓鎖江兩重客
筆墨當代俱詩鳴我來但醉春碧酒星橋脈脈向三更

郡醞舊名重碧取杜子美東樓詩重碧
酤春酒之句余更其名春碧語意便勝

江安道中

近瀘州最險處號張旗三灘言張旗之頃已過三灘其湍急如此瀘戎之間有

渡瀘亭然不知孔明竟出何路今鎖江對岸廢城下臨馬湖有韋高紀功碑踴然荒榛中疑此

或是
古迹

穠綠連村荔子丹瘴雲將雨暗前灣張旗且喜三灘駛

叱馭曾驚九折艱瀘水舟間迷古渡馬湖碑缺伴荒山
威名功業吾何有無事飄飄犯百蠻

瀘州南定樓

歸艎東下興悠哉小住危闌把一杯樓下泔泔內江水
明朝同入大江來

題譚德稱扇

德稱與楊商卿父子送余遠至瀘之合江以扇求詩各為題一絕

蠻風吹雨瘴江肥短草荒山鳥不飛盡是瀘南腸斷句
如今分與故人歸

題楊商卿扇

君歸我去兩銷魂
愁滿千山鎖瘴雲
後夜短檠風雨暗
誰能相伴細論文

題楊子容扇

雙竹軒窗聽讀書
垂天雲翼要搏扶
與君只作三年別
射策東來過石湖

譚德稱楊商卿父子送余自成都合江亭相從至
瀘南合江縣始分袂
水行踰千里作詩以別

合江亭前送我來合江縣裏別我去江流好合人好乖
明日東西南北路千里追隨不忍歸一杯重把知何處
臨歧心曲兩茫然但祝頻書無別語

發合江數里寄楊商卿諸公

臨分滿意說離愁草草無言祇淚流船尾竹林遮縣市
故人猶自立沙頭

過江津縣睡熟不暇梢船

西風扶櫓似乘槎水闊灘沉浪不花夢裏竹間喧急雪

覺來船底滾鳴沙

恭州夜泊

草山磽确強田疇村落熙然粟豆秋翠竹江村非錦里
青溪夜月已渝州小樓高下依盤石弱纜東西戰急流
入峽初程風物異布裙跣婦總垂瘤

大熱泊樂溫有懷商卿德稱

暑候秋逾濁江流晚更渾瘴風如火炊嵐月似煙昏城
郭廩君國山林妃子園故人新判袂得句與誰論

涪州江險不可泊入黔江機舟

黃沙翻浪攻排亭
潰淖百尺呀成坑
坳窪眩轉久乃平
一渦熨帖千渦生
篙師絕叫毆川靈
鳴鏡飛渡如奔霆
水從岷來如濁涇
夜榜黔江聊濯纓
玻瓈徹底鏡面清
忽思短棹中流橫
釣絲隨風浮月明

妃子園

涪陵荔子天寶所貢去州里所有此園然
峽中荔子不及閩中遠甚陳紫又閩中之

最也

露葉風枝驛騎傳
華清天上一嫣然
當時若識陳家紫

何處蠻村更有園

豐都觀

在豐都縣後三里平都山舊名仙都觀相傳前漢王方平後漢陰長生得道處陰君

上升時五雲從地湧出丹竈古柏皆其故物晉隋殿宇無恙壁畫悉是當時遺蹟內王母朝元隊仗尤奇道士云此地即所謂北都羅豐所住又名平都福地也

神仙得者王方平誰其繼之陰長生飄然空飛五雲輶
上賓寥陽留玉京石爐丹氣常夜明寵光萬柏森千齡
峽山偈仄岷江縈洞宮福地古所銘云有北陰神帝庭
太陰黑簿囚鬼靈自從仙都啟巖扃明霞流電飛陽晶

暉景下墮鑠九冰塞絕苦道升無形至今臺殿棲玲嶸
隋圻唐堊留丹青十仙怪竒溪女清瑤池仙杖紛娉婷
琅璈赴節鏘欲鳴我來秋暑如炊蒸汗流呀氣扶枯藤
摩挲衆蹟不暇評聊記梗槩知吾曾

萬州西山湖亭秋荷尚盛

叢蒼忽明眼山腰灩湖光列岫繞雲錦深林護風香西
山即太華玉井餘秋芳隔江招岑仙共擘雙蓮房

下巖

疇昔中巖一夢殘下巖風景亦高寒峽中無處堪停棹
雨後今朝始凭闌不用苦求毫相現祇教長挂水簾看
山僧勸我題蒼壁坡谷前頭未敢刊

魚復浦泊舟望月出赤甲山山形斷缺如鼉龍坐
而張頤月自缺中騰上山頂

月生赤甲如金盆蹲龍呀口吐復吞長風浩浩挾之出
影落半江沉復翻天高夜靜四山寂惟有灘聲喧水門
高齋詩翁不可作我亦不眠終夕看

夔門即事

自東川入峽路至恭州便有夔俗夾岸山悉瘠小入夔界山皆傑然連三峽夔

水不可飲取之卧龍十里之外雲安麴米春自唐以來稱之今夔酒乃不佳

峽行風物不堪論
伴暑驕陽雜瘴氛
人入恭南多附贅
山從夔子盡侵雲
竹枝舊曲元無調
麴米新筍但有聞
試覓清泠一杯水
筒泉須自卧龍分

瞿唐行

七月十九日至夔子灘瀨撒髮不可犯是夜水漲及山腹詰旦視瀨瀨則已在水中

土人云此青草齊也可以冒險而入遂鼓棹畧其頂而過郡中遣候兵立山上每一舟平安則搖幟以招後舟白鹽赤甲皆峽口大山黃嵌黑石皆峽中至險處入峽西岸有聖泉舟人或向

之疾呼曰人渴也泉即迸下一杯
許復乾余舟過甚急未之試也

川靈知我歸有程一夜漲痕千丈生中流擊楫洵作氣
夾岸簸旗呀失聲不知灩澦在船底但覺瞿唐如鏡平
鑿峽疏川狠石破號山索飲飛泉驚白鹽赤甲轉頭失
黑石黃嵌拚命輕草齊增肥無泊處竹枝凝咽空餘情
人間險路此奇絕客裏驚心吾飽更劒閣翻成蜀道易
請歌范子瞿唐行

夜泊歸州

州有宋玉
宅昭君臺

舊國風煙古新涼瘴癘清片雲將客夢微月照江聲細
和悲秋賦遙憐出塞情荒山餘閬閬兒女擅嘉名

秭歸郡圃絕句二首

花竹蕭騷小圃畦官居翻似隱淪棲巴山四合秋陽滿
杜宇黃鸝相對啼

孤城偏仄復偏仄前山後山青欲來市聲蕭條衙鼓靜
惟有叱灘喧萬雷

叱灘即黃龐灘
下連人鮓甕

宋玉宅

相傳秭歸縣治即其舊址縣左
旗亭好事者題作宋玉東家

悲秋人去語難工
搖落空山草木風
猶有市人傳舊事
酒壚還在宋家東

後巫山高一首

余前年入峽常賦巫山高今復作一篇十二峯中東西各一峯最奇

不可繪畫左右前後餘峯之可觀者尚多不止十二峯也不問陰晴雲物常相映帶尤為勝絕但以漲江湍怒難機泊鼓棹而過不復登廟前余以水暴漲得下瞿唐至巫山縣人云却須水退始可入巫峽一夜水落十餘丈遂不復滯留

凝真宮前十二峯
兩峯娟妙翠插空
餘峯競秀尚多有
白壁蒼崖無數重
秋江漱石半山腹
倚天削鐵荒行蹤

造化鍾奇矗瑤巖真靈擇勝深珠宮朝雲未罷暮雲起
陰晴竟日長冥濛瑤姬作意送歸客一夜收潦仍回風
仰看館御飛檝過回首已在虛無中惟餘烏鴉作使者
迎船送船西復東

黃牛峽

廟為黃牛神所居即石馬繫祠門處東坡所書歐公詩及本事碑石在東廡祠後高

峯之上黃牛迹客舟甚敬之以歐公故石馬亦有靈扁護甚嚴

朝離悲秋宅午榜疊石磯小留黃牛廟細讀石馬詩黃
牛隱見蒼山裏石馬至今猶馘耳當年夢境識仙翁馬

為迎門神為起物生不朽繫所逢歐詞蘇筆蒼苔封山
高水長翁之風石馬亦與翁無窮

假十二峯

即黃牛峽山自此直至平
喜填千峯重複靡不奇峭

巴東三峽數巫陽山入西陵更鬱蒼何以假為非確論
直疑溟滓弟高唐

扇子峽

兩岸山尤奇殆過巫
峽蝦蟆碚在南岸

茲行看山真飽諳今晨出峽仍窮探南磯北磯白鐵壁
千峯萬峯蒼玉筍橫前直疑江已斷崛起競與天相攬

蜀山欲窮此盤礴禹力且盡猶鐫剗望舒宮中金背蟾
泥塗脫盡餘老饒下飲岷江不知去流涎落吻如排髯
挈瓶犧棹斟清甘未暇煮茗和薑鹽聊將滌硯濡我筆
恍惚詩律高巉巖

荆渚中流回望巫山無復一點戲成短歌

千峯萬峯巴峽裏不信人間有平地渚宮回望水連天
却疑平地元無山山川相迎復相送轉頭變滅都如夢
歸程萬里今三千幾夢即到石湖邊

魯家汊入沱

三江口即岳陽路水大難行遂入沱行沱中最空曠處名百里荒蕪區也

過盡巴東巫峽長
荆川鼓棹更茫茫
避風怕入三江口
乘月貪行百里荒
夜後逢人盡刀劍
古來踏地皆耕桑
可憐行路難如此
一簇寒蘆尚稅場

鄂州南樓

誰將玉笛弄中秋
黃鶴飛來識舊遊
漢樹有情橫北渚
蜀江無語抱南樓
燭天燈火三更市
搖月旌旗萬里舟
却笑鱸鄉垂釣手
武昌魚好便淹留

題黃州臨臯亭

夏口風帆赤壁磯
雪堂醖酒竹樓棋
繫舟一日黃州下
只辦登臨不辦詩

江州庾樓夜宴

前瞰大江後臨廬山登臨名勝殆甲他處庾亮南樓乃在武昌非此

也亮常刺江州後人製此名非斯樓之要

岷江漱北渚
廬阜窺南窗
名山復大川
超覽茲樓雙
何必元規塵
自足豪他邦
使君秣田熟
新涼蕩酒缸
落景澹碧瓦
長虹吐金缸
客從三峽來
噩夢隨奔瀧
小留聽

琵琶船旗卷修杠請呼裂帛絃為拊洮河腔曲終四憑
闌倦遊心始降明發挂帆去曉鐘烟外撞

東林寺

慧遠師白蓮社也傍有樂天草堂對山絕頂即天池文殊現燈處李成焚劫南北山

獨不毀
二林

談易繙經宰木春三生猶自裊烟熏客塵長隔虎溪水
劫火不侵香谷雲老矣懶供蓮社課歸哉快讀草堂文
山頭一任天燈現箇事何曾落見聞

過虎溪對東林蒼巖翠樾下浸大澗宛似靈隱冷

泉囑長老法才作亭名曰過溪且為率山丁薙草
定基一朝而畢

過溪無限翠屏開大笑從教虎子猜不獨山中添故事
仍教題作小飛來

病倦不能過谷簾三峽寄題

白龍青峽紫烟爐山北山南只半塗說與同來綠玉杖
他年終補卧遊圖

湖口望大孤

廬阜岡勢斷江流
潏相通大孤如小冠
插入齋淪中我欲蛻
濁浪往馭揚瀾風
晃晃銀色界滢滢水
晶宮濯足望八荒
列宿羅心胃客帆詎
肯駐搔首蒼煙叢

澎浪磯阻風

浦口藏舟尋丈慳
篙師抱膝朝暮閒
逆風來從水府廟
濁浪欲碎小孤山
太白猶高缺蟾墮
長江未盡歸鬢斑
短歌聊復怨行路
當有聽者凋朱顏

馬當湊阻風居人云非五日或七日風不止謂之

重陽信

拍岸回流逆上磯
枯楊折葦靜相依
趁墟漁子晨爭渡
賽廟商人晚醉歸
重九信來風未慙
大千行徧昨俱非
羈愁萬斛從頭數
帶眼今秋又解圍

放舟風復不順再泊馬當對岸夾中馬當水府即
小說所載神助王勃一席清風處也戲題兩絕

萬里江隨倦客東
馬當山背勒孤篷
無才解賦珠簾雨
誰肯相賒一席風

禁江上口柏山東三日荒寒繫短篷却憶宮亭湖裏去
隨人南北解分風

守風嘲舟子

奪命稠灘百戰餘守風端坐恰乘除日長飽飯佳眠覺
閒傍蘆花學釣魚

佛池口大風復泊

碧葦無思連天生青山有情終日橫風聲洶怒木朝拔
川氣流光珠夜明誰能坐守白頭浪我欲往騎金背鯨

俛仰之間撫四海可憐步步愁江程

長風沙

夕陽明遠帆高浪兀孤嶼綿綿淮山來閃閃沙鳥去落
木兩山家炊煙南北渡眉伸擊汰行夢愕阻風處

九月八日泊池口

斜景下天末煙霏酣夕紅餘暉染江色潏灩琥珀濃我
從落日西忽到大江東回首舊遊處曛黃錦城中藥市
并樂事歌樓沸晴空故人十二闌豈復念此翁

池州九日用杜牧之齊山韻

年年佳節歌式微秋浦片帆還欲飛
萬里蜀魂思遠道九歌楚調送將歸
杯中山影分秋色木末江光借夕暉
細撚黃花一枝盡霏霏金屑滿征衣

離池陽十里清溪口復阻風

恰從秋浦挂簾條又泊清溪十里餘
愁水愁風吹帽後作雲作雨授衣初
遠尋草市沽新酒牢閉篷窗理舊書
行路阻艱催老病騷騷落雪滿晨梳

梅根夾

辛苦凌波棹平安入夾船月明漁浦網風側瓦窑煙老
圃容挑菜村巫橫索錢且投人處宿終夜得佳眠

宿長蘆寺方丈

塔廟新浮水汀洲舊布金聊憑一葦力與障萬波侵帆
影窺門近鐘聲出院深夜闌雷破夢欹枕聽潮音

將至吳中親舊多來相迓感懷有作

望見家山意欲飛古來燕晉一沾衣回思客路豈非夢

乍聽鄉音真是歸新事畧從年少問故人
差覺坐中稀
不須更說桑榆晚霜後鱸魚也自肥

石湖詩集卷十九

石湖詩集卷二十

宋 范成大 撰

淳熙五年四月二日直宿玉堂懷舊二絕句

桂海冰天老歲華直廬重上玉皇家當年曾識青青鬢
惟有東牆一架花

雪山刁斗不停撾夜把軍書敢顧家珍重玉堂今夜夢
靜聞宮漏隔宮花

初歸石湖

曉霧朝暎紺碧烘橫塘西岸越城東行人半出稻花上
宿鷺孤明菱葉中信脚自能知舊路驚心時復認鄰翁
當時手種斜橋柳無限鳴蜩翠埽空

寄蜀州楊道人

老來萬事總蕭然猶憶西州暑雪邊為報岷峨山水道
如今真箇得歸田

送同年萬元亨知階州

老我曾頌萬里春憐君飛棹也浮秦當年千佛名經裏
又見西遊第二人

路入南山舊漢畿油油清渭照牙旗古來百戰功名地
正是雞鳴起舞時

十年關隴困科輸聖德如天盡埽除臨遣中和二千石
好乘春日下寬書

次韻蜀客西歸者來過石湖并寄成都舊僚

走徧塵埃倦鳥還故鄉元在水雲間黃粱飯裏夢魂醒

青筠笠前身世閒鷗鷺飛來俱玉立松篁歲晚各蒼顏
岷峨交舊如相問鐵鎖無扃任客攀

十一月大霧中自胥口渡太湖

白霧漫空白浪深舟如竹葉信浮沉科頭晏起吾何敢
自有山川印此心

靈祐觀

即古神景宮也相傳舊宮廊百間繞三大殿謂之百廊三殿今不復有堂前有垂絲

檜三本

暘谷西門鎖洞宮古苔班駁檜蒙茸百廊三殿惟晉井

萬壑千巖有瘦筇

林屋洞

仙經一名左神幽虛洞天正洞門左觀中出觀左門又有二門一名丙洞一名暘谷

洞

擊水搏風浪雪翻煙銷日出見仙村舊如浮玉北堂路
今到幽墟三洞門石燕翔飛遮炬火金籠深阻護嵌根
寶鐘靈鼓何須叩庭柱宵晨已默存

包山寺

在毛公壇前別峰下慈受深老所作深老入山時手植二竹今遂成林山上松多非

種植風吹松子白歲謂之飛松

仙塢遜半坐精廬遷古幢
稿衲昔開山至今坐道場
熾然說慈忍禪海薰戒香
穉竹暗寒碧飛松盤老蒼
船鼓入宴坐紅塵隔滄浪
藤杖嬾歸去共倚蒲團牀

毛公壇福地

西山最深處毛公劉根也身生綠毛故云有劉道人作小菴在隱泉之上

松蘿滴翠白晝陰七十二峰中最深綠
毛仙翁已仙去惟有石壇留竹塢
竹陰埽壇石槎牙漢時風雨生薜花
山中笙鶴尚遺響湖外人烟驚歲華
道人眸子照秋色邀我分山築丹室
驅丁役甲莫兒嬉渴飲隱泉饑餌朮

上方寺

在消夏灣上

樣棹古消夏楮筇新上方珠灣鎖員折冰鏡沉空光楓
纈醉晴日橘黃明蚤霜閒門松竹徑隨處有清涼

消夏灣

吳王避暑處平湖
山一灣雲水勝絕

蓼磯楓渚故離宮一曲清漣九里宮縱有暑光無著處
青山環水水浮空

橘園

橘中有佳人招客果下遊胡牀到何許坐我金碧洲沉

沉剪綵山垂垂萬星毬奇采日中麗生香風外浮折贈
黃團雙珍逾桃李投拆開甘露囊快吸冰泉甌熱腦散
五濁豈止沉疴瘳未知商山樂能如洞庭不

華山寺

在西山盡處多泉泓僧房數處有之有湯
岐公吳茂老樞密孫仲益尚書諸公題詩

五湖西岸孤絕處旃檀大士來同住性空真水徧清涼
隨緣出現無方所蒙泉新潔鑑泉明滄茗羹藜甘似乳
何須苦問蓮開未桂子萱花了今古三翁綵筆照青霞
從此他山都不數我今閒行作閒客暫借雲窓解包具

魂清骨冷不成眠，徹曉跼趑聽粥鼓。
脚力有餘，西塢盡。明日灣頭更鳴櫓，却上東山喚德雲。
別峰應在銀濤許。

縹緲峰

西山最高峰

滿載清閒一棹孤，長風相送入仙都。
莫愁懷抱無消豁，縹緲峰頭望太湖。

鎮下放船過東山二首

打頭風急鼻雷鼾，醉夢閒心鐵石頑。
惟有愛山貪未厭，西山繞了又東山。

老禪竿木各逢場詩客端來共葦航一任顛風聒高浪
滿船歡笑和詩忙

翠峰寺

在東山雪竇顯老道場山半有悟道井
庭下大羅漢木兩株虬屈蟠壯甚奇古

來從第九天橋社繫歸船借問翠峰路誰參雪竇禪應
真庭下木說法井中泉公案新翻出諸方一任傳

社山放船

社下鐘聲送客船凌波撾鼓轉滄灣橫煙裊處雞豚社
落日濃邊橘柚山八表茫茫孤鳥去萬生擾擾一舟間

湖心行路平如鏡
陸地風波却險艱

東山渡湖

渡船帆飽如張弓
倏忽世界寒沖融
堪與無垠日夜汎
浩浩元氣蓬蓬風
湖光日色不可辨
但見水精火齊合
集成虛空波臣川
后敬愛客約束祕
怪驅魚龍大千總
作大圓鏡光中飛
渡迷西東蒼茫一
身無四壁八方上
下惟孤蓬毛仙出
迎笑相問何乃自
苦荒寒中吾生蓋
頭乏片瓦到處漂
搖稱寓公猶嫌塵
土礙人眼茲遊勝

絕餘難同九衢車馬恍昨夢付與一笑隨飛鴻

與游子明同過石湖

契闊相逢一笑歡當年森桂共驂鸞試談舊事醒村酒
仍趁新晴暖客鞍梅粉都皴啼宿雨柳黃不展噤春寒
從今鼎鼎多幽事仍喜蛙聲不在官

次韻同年楊廷秀使君寄題石湖

儀鳳當瑞九韶成何事栖鸞滯碧城公退蕭然真吏隱
文名籍甚更詩聲句從月脇天心得筆與冰甌雪椀清

書到石湖春亦到平堤梅影穀文生

半世輕隨出岫雲如今歸作卧雲人
小山有賦招遊子大塊無私佚老身
禪版夢中千嶂曉鬢絲風裏萬花春
新年社瓮鶯黃滿賸醉田頭紫領巾

自閭門騎馬入越城

日影穿雲亦未濃夜來疎雨洗清空
村前村後東風滿略數桃花一萬重

斷橋隕岸數家村雨少晴多減漲痕
雪白鶯兒綠楊柳

日高猶自掩柴門

姚夫人輓歌詞

衿悅虞鰥後詩書孟母鄰高懷琴意靜晚福詔恩新自
古悲風木于今詠澗蘋松銘無溢美百世考堅珉

北山草堂千巖觀新成徐叔智運使吟古風相賀
即次韻謝之

北山松竹堪怡顏千巖觀前多好山誰云都無卓錫地
亦尚有此茅三間洞門無輪常不關小徑百曲蒼龍盤

衆芳迷人不知處片雲與我俱忘還花前一杯重鼎呂
明日庠田并灌圃種苗種豆從此忙昨夜驚雷送膏雨
贈舉書記歸雲丘

一枕清風四十霜孤生無處話淒涼相看只有龐眉客
還在雲丘舊草堂

四股澗松雷斧碎十圍巖桂燒痕枯不知堦下跳珠處
舊竹春來有筍無

青山面目想依依水石風林入夢思白髮蒼顏心故在

只如當日看山時

題查山林氏菴

庭戶清深宅翠微
雪如佳壁喚題詩
煙梢矗矗青圍屋
露葉鮮鮮綠滿籬
宿雨一春纔汎鴨
新蕪幾日已藏碑
山僧見客如枯木
疑是懶殘南嶽師

木瀆道中風雨震雷大作

惡風奔雲何壯哉
溪水欲立山欲摧
石岸迸裂纜邊樹
胡牀動搖船底雷
靈巖塔後雨脚挂
胥口廟前浪花來

蓬漏衣沾不足惜
酒瓶傾倒愁空罍

光福塘上

指點炊煙隔莽蒼
午餐應可寄前莊
雞聲人語小家樂
木葉草花深巷香
春去已空衣尚絮
雨來何晚稻初芒
祇今農事村村急
第一先陂貯水塘

與至先兄遊諸園看牡丹三日行徧

柱杖無邊處處過
粉圍紅繞奈春何
閭門昨日看不足
今日婁門花更多

蜂蝶蕭騷草露漫
小家籬落閉荒寒
欲知國色天香句
須是倚闌燒燭看

次韻同年楊使君回自毘陵同泛石湖舟中見贈
客舫中流下人家夾岸看
落花堆錦煖吳藕鏤冰寒
莫厭清歡暫須知後會難
小詩煩本事任禿絲毫端

曲誤不須顧客狂
當好看日斜雙槳
急風駛夾衣寒賸
說歸田樂休歌行路難
石湖三萬頃何處覓憂端

北渚乘風渡西山帶霧看
袖單嫌翠薄杯淺怯金寒
宿

雨收全易春醒解却難且留行色住重肯過蘇端

頃乾道辛卯歲三月望夜與周子充內翰泛舟於
石湖松江之間夜艾歸宿農圃距今淳熙己亥凡
九年矣余先得歸田復以是夕泛湖有懷昔遊因
賦詩紀事

石湖花月浮春空憶共仙人同短篷三更半醉吹笛去
櫂入濕銀天鏡中鶴鳴喚歸斗未沒却步扶疎花底月
不知行到碧桃邊但見天風吹積雪月圓月缺今幾回

依舊滿湖金碧堆仙人還上玉堂宿合有片時清夢來
一笑流光飛電抹嫦娥相對兩愁絕桂枝應亦老無花
蟾兔不須疑鶴髮

嬾牀午坐

晴霄垂北窓卧我翠幄中不知幾斧鑿成此太虛空前
雲稍過盡後雲來無窮鳥雀有底忙激彈過牆東不如
雙飛蝶欸欸弄微風我亦困思生拋書眼蒙茸

秋前三日大雨

暑殘堪喜亦堪憎，恰似沙場喋血兵。
縱有背城餘燼在，能禁幾度瀉檐聲。

秋前風雨頓涼

秋期如約不須催，雨脚風聲兩快哉。
但得暑光如寇退，不辭老景似潮來。
酒杯觸撥詩情動，書卷招邀病眼開。
明日更涼吾已卜，暮雲渾作亂峰堆。

立秋後二日泛舟越來溪三絕

西風初入小溪帆，旋織波文縞淺藍。
行入蒹葭無水面，

紅蓮沉醉白蓮酣

一川新漲熨秋光
挂起篷窗受晚涼
楊柳無窮蟬不斷
好風將夢過橫塘

飯後茶前困思生
水寬風穩信篙撐
不知浪打船頭響
聽作凌波解佩聲

采菱戶

采菱辛苦似天刑
刺手朱殷鬼質青
休問揚荷涉江曲
只堪聊誦楚詞聽

曉起聞雨

老來稍喜睡魔清
兀坐枯株聽五更
蕭索輪囷憐燭燼
飛揚跋扈厭蚊聲
登高事了從教雨
刈熟人忙却要晴
莫道西成便無慮
大須濃日瞰香秔

說虎軒夜坐

白雲深處卧癡頑
挂起東窓水月寬
但得好詩生眼底
何須寶剎現毫端
一身莫作官身想
萬境都如夢境看
解舍鄰翁能日醉
呼來分與一蒲團

偶書

太行巫峽費車舟，休向滄溟認一漚。
日下冰山難把玩，雨中土偶任漂流。
元無刻木牽絲技，但合收繩卷索休。
惟有酒缸并飯甌，却須秔秠十分收。

睡覺

漏箭聲中斷角哀，界窓猶有月徘徊。
心兵休為一蚊動，句法却隨孤鴈來。
漱罷玉池甘似醴，夢餘金鼓辯如雷。
夜長展轉添許事，推枕蕭然一笑咍。

閬門行送胡子遠著作守漢川

前年送君朝明光今年送君還故鄉錦官樓上一樽酒
萬里閬門折楊柳吳波沄沄蜀山蒼人生行路如許長
相逢相送鬢如雪人生能禁幾離別房湖風月開春臺
石湖水雲歸去來西棹東帆君未了相逢還向閬門道
嘲蚊四十韻

暑魃方肆行羽孽亦厲習肖翹極么麼塊土累闢翕濕
生同糞蝸腐化類宵熠初來閬郭郭少進亘原隰嚶如

蠅聲薨聚若螽羽揖俄為殷雷開遂作密霰集口銜鋼
針鋒力洞衲衣襲啾聲先計議著肉便噓吸立豹猶未
定卓錫已深入血隨姑嘖升勢甚轆轤汲沉酣尻益高
飽滿腹漸急晶晶紫蠚眼滴滴紅飯粒拂掠倦體煩爬
搔痒肌溢抹東不虞西擒一已窺十新癢蓓蕾漲宿暈
斑斕浥竟夜眠轉展連牀歎於悵云何人戚欣乃係汝
張歛驅以葵扇風薰以艾煙濕藥長鎮歲遮帳隙亟補
葺火攻憚穢臭手拍嫌腥汁伏翼佐埽除網蛛助收拾

薄暮洵交攻大明訏未戢牛革厚逾羶鱉介鉅勝釵遭
汝若欲困嗟人何以給夏蟲雖衆多罪性相百什蜂螫
豈房櫳蟻蝨但禪褶羊羶蟻登俎驥逸蟲附帛蠛惟舞
醯羗蟬止崇書表蚤為鴝所撮蠅亦虎能執彼愆可貫
死汝罪當獻級涼颯倏然至醜類殆哉爰一吹背吻破
再鼓翅翎繫三千蹠頡利百萬走尋邑快哉六合內蔑
有一塵立虛空既清涼家巷得寧輯雞窓夜可誦蛩機
曉猶織雨簾繡浪卷風燭淚珠泣客來添羽觴人靜拂

塵笈恍還神明觀似啓坏戶蟄消長誰使然智力詎能
及

閩門戲調行客

日夜飛帆與跨鞍閩門川陸路漫漫人生自苦身餘幾
天色無情歲又寒萬事惟堪六如觀一杯莫信四并難
重陽雖過黃花少尚有遲開玉雪團

九月二十八日湖上檢校籬落

村北村南打稻聲荒園屐齒亦嬉晴菊邊更覺朝陽好

松下偏聞晚吹清
一歲無非吾樂事
千金不博此閒行
周遭踏徧芙蓉岸
足痺腰頑栩栩輕

晚步吳故城下

意行殊不計榛菅
風袖飄然勝羽翰
拄杖前頭雙雉起
浮圖絕頂一鷗盤
醉紅匝地斜曛暖
熨練涵空漲水寒
却向東臯望煙火
缺蟾先暎柵林丹

上沙田舍

更無雲物起微陰
隴畝人家各好音
歲晚陽和歸稻把

夜來霜力到楓林
兒童笑裏豐年面
烏鳥聲中落日心
釀秫炊秬都入手
賸拚腰腳辦登臨

與現壽二長老遊壽泉因話去年林屋之遊題贈
何年錫杖劖清甘
天遣深源壽此菴
金鑿萬枝浮倒影
為君題作菊花潭

松風放浪入雲關
二衲相從一士閒
人與瘦筇俱老健
去年今日在包山

渡太湖

囊風閣雨半晴陰慘淡誰知造化心
委命浮沉惟一葉計身輕重亦千金
紅塵猶道不勝險白浪莫嗔如許深
晚得薜山堪寄纜卧聽鼉吼與龍吟

再渡胥口

古來此地快蓬心天繞明湖日照臨
一鴈雲平時隱現兩山波動對浮沉
衰髯都共荻花老醉面不如楓葉深
罾戶釣徒來問訊去年盟在肯重尋

跨馬過練墟喜晴

稻穗初乾怕雨時
晚來蒸煖欲霏微
西風若肯吹雲盡
不惜飄飄側帽歸

晚歸石湖

何須駟馬街鄉關
只作歸農老圃看
夢裏曾腰綰結佩
年來新著情遊冠
和煙種竹聊醫俗
帶月聞蛙不在官
久矣此心恬不動
如今併與此身安

北山堂開爐夜坐

困眠醒坐一龕多
竹洞無關斷客過
貪向爐中煨楮枰

懶從掌上看菴摩閒無雜念惟詩在老不甘心奈鏡何
八萬四千安樂法元無祕密可伽陀

入城

十里清風一餉間片帆真欲解人顏林家莊近聞鶩鴨
船到閭門儘未關

儘字俗用已久據
理只合用盡字

次韻蚤蚊

羽蟲么麼塞區寰造化胡為弗疾頑長養汙泥草木處
縱橫大地山河間夜聲雷動人力屈秋喙花開天理還

金安四庫全書
卷二十一
但願江湖無白鳥何須金鼎鑄神姦

冬至晚起枕上有懷晉陵楊使君

新衣兒女鬧燈前夢裏莊周正栩栩騎馬十年聽曉鼓
人生元有日高眠

多稼亭邊有所思冬來撚却幾行髭也應坐擁黃紬被
斷角孤鴻總要詩

寒雨

何事冬來雨打窓夜聲滴滴曉聲淙若為化作漫天雪

徑上孤篷釣晚江

戲贈腳婆

日滿東窓照被堆宿窓猶自煖如煨尺三汗脚君休笑
曾踏鞢霜霜待漏來

除夜前二日夜雨

雪不成花夜雨來壠頭一洗定無埃小童却怕溪橋滑
明日先生合探梅

次韻章秀才北城新圃

方流桃花塢窈窕入壺天碧城當巖岫清灣如澗泉風
月欲無價聊費四萬錢雪後春事起紅雲蜂蝶邊
西城如西塞桃花古來多釣艇鱖魚肥前身張志和煙
霏幾白鷺風雨一綠簑清江韻新引清絕勝陽阿

夢中作

漠漠人間一氣平虛無宮殿鎖飛瓊碧雲萬里海光動
何處書來金鶴鳴

北城梅為雪所厄

凍藥粘枝瘦欲乾
新年猶未有春看
雪花祇欲欺紅紫
不道梅花也怕寒

雪後六言二首

雨聲和深巷
展風力到短檠
燈可惜滴殘檐
雪從教漂盡河冰

歲寒破屋萬卷風
急疎窓一燈高卧
眼生醉纈遠遊鬚
有堅冰

元夕大風雨二絕

東風無賴妒華年一夜淒寒到酒邊
放盡珠簾遮畫炬
莫教檐雨濕青煙

河傾海立夜翻盆不獨妨燈更損春
凍澁笙簧猶可耐
滴皺梅頰勢須嗔

春懷

柳顰梅笑各相惱詩債棋讎俱見尋
莫道幽居無一事
春來風物總關心

自橫塘橋過黃山

陣陣輕寒細馬驕竹林茅店小帘招東風已綠南溪水
更染溪南萬柳條

次韻謝李叔玠追路送筍

墮地錦裯茁解衣溫玉姿來償食竹債大勝伏雌炊少
日羹藜子老來煨芋師盤餐登異味指動已先知

石湖詩集卷二十

石湖詩集卷二十一

宋 范成大 撰

秀州門外泊舟

拍岸清波撲岸埃
黑頭霜鬢幾徘徊
禾興門外官楊柳
又見扁舟上堰來

臨平道中

煙雨桃花夾岸栽
低低渾欲傍船來
石湖有此紅千葉

前日春寒總未開

夜過越止不得遊覽

王程公事兩相催
衝雨片帆連夜開
千巖萬壑在何處
山陰道中無好懷
豈有酒船尋賀老
興盡那能訪安道
鑑湖春色漫芳菲
付與青青湖畔草

道中古意二絕

桃李寂無言
垂楊照溪綠
不見芰蘿人
空吟若邪曲
浣紗寂不好
辛苦觸戰箭
東施無麗質
安穩嫁鄉縣

觀楔帖有感三絕

古人賦多情無事輒愁苦
蘭亭一觴詠感慨乃如許
寶草種九泉摹本範百世
白鷺滿波間誰識腕中意
三日天氣新楔飲傳自古
今人不好事佳節棄如土

浙東舟中

處處槿樊園家家桃廡門
魚鹽臨水市煙火隔江村
雨過張帆重潮來汲井渾
彎跼短篷底休說兩朱轡

初赴明州

四征惟是欠東征行李如今忽四明海接三韓諸島近
江分七堰兩潮平擬將寬大來宣詔先赴清和去勸耕
頂踵國恩元未報驅馳何敢歎勞生

昌國縣圖障於海中題字云自此與

高麗國接界蓋
宇內極東處也

寄虎丘範長老

誰云簪紱坐成禽亦漫為官漫好音身已備嘗生老病
心何曾住去來今一波不動月空照萬籟無情風自吟
持此東歸似同志故應分我半山林

次韻汪仲嘉尚書喜雨

雨雲渾似雪雲同
天意人心本自通
吏役驅驅騎馬滑
何如欹枕閉門中

老身窮苦不須憂
未有毫分慰此州
但得田間無歎息
何須地上見錢流

曉起

窓明驚起倒裳衣
鈴索頻搖定怪遲
即入簿書叢裏去
少留欹枕聽黃鸝

大風

四明亦有颶風

颶風來從海若家
青天白地忽飛沙
煩將殘暑驅除盡
只莫顛狂損稻花

大黃花

大芋高荷半畝陰
玉英危綴碧瑤簪
誰知一葉蓮花面
中有將軍劍戟心

進修堂前荷池

方池留水勝埋盆
露入蓮腮沁粉痕
鈴索無聲人不到

小禽飛入鬧荷根

州宅堂前荷花

凌波仙子靜中芳也帶酣紅學醉粧有意十分開曉露
無情一餉歛斜陽泥根玉雪元無染風葉青蔥亦自香
想得石湖花正好接天雲錦畫船涼

新荔枝四絕

荔浦園林瘴霧中戎州沽酒擘輕紅五年食指無占處
何意相逢萬壑東

海北天西兩鬢蓬
閩山猶欠一枝筇
鄞船荔子如新摘
行脚何須更雪峰

甘露凝成一顆冰
露穠冰厚更芳馨
夜涼將到星河下
擬共嫦娥鬪月明

棹泊飛來不作難
紅塵一騎笑長安
孫郎皴玉無消息
先破潘郎玳瑁盤

四明海舟自福唐來順風三數日至
得荔子色香都未減大勝戎涪間所

產莆陽孫使君許寄蜜荔過期不至哉
車潘進奏餉玳瑁一種亦佳并賦之

角東道院午坐

一夜西風轉酒旗
午餘殘暑不多時
綠荷半蝕霜前葉
丹桂全封雨後枝
忙裏有詩償日課
老來無賦為秋悲
梳頭小隸那知此
強向窓前數鬢絲

東門外觀刈熟民間租米船相銜入門喜作二絕
菊莎杞棘爰無煙
日日文書橫索錢
今日甬東官況好

東津門外看租船

文書謂諸司督逋者

潮到靈橋綠繞船
海邊力穡屢豐年
淡青山色深黃稻
恰似胥門九月天

探木犀

秋半秋香花信遲
攀枝擘葉看纖微
昨朝尚作茶槍瘦
今雨催成粟粒肥

九月五日晴煖步後園

海氣烘晴入斷霞
半空雲影界山斜
輕羅小扇游蜂畔
只比東風有菊花

九日憶菊坡

菊坡長恨隔橫塘
城郭山林自不雙
放棹松江花已遠

濤江之外更鄞江

重陽九經堂作

俗間佳節自息息老去悲秋又客中青嶂捲簾三面月
黃花吹鬢幾絲風十年故國新栽柳萬里他鄉舊轉蓬
誰與安排今夜夢片帆飛到小籬東

真瑞堂前丹桂

血色凡花太俗生花工新意染秋英袍紅太重鞋紅淺
畫不能摹句寫成

官忙風月鎮長閒，開遍香紅酒尚寒。
若要與花相領畧，

千巖隨分有闌干。

石湖千巖觀前
手植丹桂二畝

題羔羊齋外木芙蓉

慵粧酣酒夕陽濃，洗盡霜痕看綺叢。
綠地圍花紅錦障，不知庭院有西風。

進思堂夜坐懷故山

塵事潮來不可推，身如病鶴強絳絳。
簿書遮斷尋詩路，風雨驚殘問月杯。
想得竹門無客到，直須雪夜有船迴。

鱸鄉望眼雙明處祇欠凌霄萬仞臺

楊少監寄西征近詩來因賦二絕為謝詩卷中第一首乃石湖作別時倡和也

柴門重客醉中歸尚憶揮毫索紙時何物與儂供不朽
西征卷首石湖詩

錦囊隨上越王臺天海風濤亦壯哉書到嶺頭梅恰動
一枝應伴一篇來

羔羊齋小池兩溪木芙蓉盛開有懷故園

洞戶掩秋深畫橋橫晚靜嫋嫋芙蓉風池光弄花影懷
我白鷗邊錦帳繚千頃明河拍岸平紅綠染天鏡釣船
無畔岸收拾入簿領牆籬東院落寒窳令人癭

鹿鳴席上贈貢士

登陸由來說四明台星光處更魁星海濱二老尊周室
館下諸生右漢廷秋賦重增人物志春闈俱上佛名經
一飛好趁扶搖便咫尺西興是北溟

大廳後堂南窻負暄

萬壑無聲海不波一窓油紙暮春和醉眠陡覺鼯鼯贅
圍坐翻嫌楮拙多水煖玉池添漱嚙花生銀海費揩摩
端如擁褐茅檐下祇欠烏烏擊缶歌

晚步北園

刮地晴飈退海痕出門無扇可障塵麥粘瘠土何時雪
梅糝疎林昨夜春天鏡風煙疑夢事鬢霜時節尚官身
裏章束帶朝還暮慚愧青鞋紫領巾

謝賜臘藥感遇之什

鴻寶刀圭下九關十年長奉璽封看扶持蒲柳身猶健
收拾桑榆歲又寒天地恩深雙鬢雪山川途遠一心丹
疲吐疾苦今何似拜手歸來愧伐檀

立春後一日作

浮生萬法本悠哉大笑羲娥轉轂催官事已邀癡作伴
春風應共老俱來雲容雪意將詩問柳眼花心待酒媒
九十韶光天不靳人間笑口自難開

春前十日作

臘淺猶賒十日春官忙長愧百年身雪催未動詩無力
愁遣還來酒不神節物何曾欺老病書生自慣說悲辛
終期戚促成何事今古紛紛一害塵

三江亭觀雪

陰山陽朔雪中迴行到天西玉作堆乘興却遊東海上
白銀宮闕認蓬萊

懷歸寄題小艇

日出塵生萬劫忙可憐虛費隙駒光若教閒裏工夫到

始覺淡中滋味長歲晚角巾思芋栗年來手版愧耕桑
松風蘿月須相信春水深時上野航

雪後雨作

瑞葉飛來麥已青更煩膏雨發欣榮東風不是厭滕六
却怕雪天容易晴

再雪

銀竹方依檐住瑤光又入簾窺一白本憐麥瘦重來應
為梅遲

立春日陪魏丞相登三江亭

佳節登臨始此回，聊從晡曉望蓬萊。
水分江北渡頭去，風自海東潮外來。
太白天寒猶帶雪，十洲池煖已浮醅。
一尊往酌發船鼓，我亦歸帆相次開。

寄題鹿伯可見一堂

夢覺春闌俱轉蓬，仙凡今隔玉霄東。
聊攀鐵鎖問何似，豈敢避堂邀蓋公。

生來於君一歲長，決去愧我三年遲。
今世誰不落第二。

著鞭尚續堂中詩

雪溪興盡船當迴却擬登陸遊天台經行見一堂前路
轉入湖山尋悞來

將赴建康出城

牒訴繽紛塞甕天今年癡坐兩三椽出門納納乾坤大
依舊青山繞畫船

寺莊

大麥成苞小麥深秧由水滿綠浮針今年一飽全無慮

寬盡歸舟去客心

育王方丈

窓紙悲嘶萬壑風
石梁飛澗倒枯松
因勤昨夜三更雨
添作投淵雪色龍

鰻井

決甃神通未易論
雨聲留客夜翻盆
不辭客路春泥滑
且足秧田舊水痕

妙喜泉

二士共談碑上法
千僧同酌沼中泉
法門泉味知多少
水桶繩頭一串穿

明月堂

古來禪窟鎖巖扃
拂子崔嵬拄杖橫
塔上佛光堂上月
莫言公案不分明

自育王過天童松林三十里

竹輿窈窕入蕭森
逗雨梳風冷客襟
翠錦屠蘇三十里
不知脚底白雲深

香山

抖擻軒裳一闋塵任教空翠滴烏巾老身已到籃輿上
處處青山是故人

育王望海亭

海雲晦霽日籠蔥案指光中萬象空想見蓬萊西望眼
也應知我立長風

天童三閣

千佛羅漢善財

松蘿幕天墮空翠迎面風香三十里曾宮亭亭隔瑤水

碧瓦瓊樓五雲裏千佛當門無半偈聲聞未解祖師意
徧參踏破青鞋底前樓後閣玲瓏起閒客那知如許事
東齋聽雨爛熳睡覺來一轉聊布施普請雲堂來擬議

石湖詩集卷二十一

謹案卷十九第七頁前八行夜泊歸州刊本州記

舟據本注改

卷二十第八頁後三行庭戶清深宅翠微刊本庭
戶二字倒據宋詩改

第九頁前一行酒瓶傾倒愁空罍按宋詩倒作側
辭義並通今仍其舊

第十五頁前六行缺蟾先暎榭林丹按宋詩鈔榭
作樹今從本集

第十七頁前七行羽蟲么麼塞區寰刊本麼訛魔

據宋詩改

卷二十一第八頁後七行九十韶光天不斬刊本

斬訛覲據宋詩改





總校官庶吉士臣侍朝

校對官編修臣閔惇大

校對官庶吉士臣章宗瀛

謄錄舉人臣嚴儀

謄錄監生臣江潮

欽定四庫全書薈要

集部

石湖詩集卷二十四

二五

詳校官助教臣謝登雋



石湖詩集卷二十二

宋 范成大 撰

送江朝宗歸括蒼

平生三邂逅相看成老翁詩情故萃律袖有天都峰江

山佳麗地登臨苦怱怱塔燈落淮水寺樓倚霜空攬拾
著錦囊撫掌夸窮工歸轡不可挽思入孤征鴻洞天我
昔遊俛仰星一終士友歎契闊吏民念罷癯婆婆故將

軍白髮簿書叢足趼雖四方夢寐煙雨東歸田有脚力
尚往尋行蹤期君斬寒藤伴我楮枯筇

鍾山閣上望雨

天閣山長雨似煙忽然飛去暗平川
秔禾未實私禾瘦不用廉纖便霈然

除夜

婪尾杯殘雪滿簪牀頭歷日費光陰
故山巧入忙中夢新歲尤關客裏心
烏鵲倦時三匝繞鷓鴣穩處一枝深

勞生佚老尋常事從政那堪力不任

元日

老來百味絮沾泥期會關身尚火馳
幾夜鄉心歌枕處今年脚力上樓時
酒缸幸有乾坤大丹鼎何憂日月遲
莫道神仙無可學學仙猶勝簿書癡

體中不佳偶書

生平人比似維摩試比厄辱不啻過
舊摘衰髯今雪偏頻揩病眼轉花多
從來世味聊復爾此去官身如老何

收拾顏齡加藥餌尚堪風月對婆娑

坐嘯齋書懷

時方治
眼濟

老來窮苦事相違兀坐鈴齋竟日癡
眼目昏緣多押字胸襟俗為少吟詩
月侵燈影吏方去春徧梅梢官未知
直待食新方綬帶明朝騎馬過陵陂

寶公祈雨感應用陳申公韻賦詩為謝

鰼原龜坼暮春時夾路爐薰共禱祠
喚起雲頭千嶂湧飛來雨脚萬絲垂
無情梅塢猶紅綻有意秧田盡綠滋

大施門開須滿願願均此施匝天涯

送徐叔智運使奉祠歸吳中

手種湖邊花百畝東風日夜催歸去當年辛苦種花時
不道白頭猶未歸君如肯過城南陌但向水雲紅處覓
煩呼猿鶴問平安當有畦丁解看客我今江船亦欲東
檣迎楓橋成兩翁壓枝萬朵雖過盡尚及巢龜蓮葉中

送舉老歸廬山

二千里往回似夢四十年今昔如浮去矣莫久留桑下

歸歟來共煨芋頭

題現老真

三十年來共葛藤如今蓮社冷如冰
茶瓜櫻筍遊山會從此齋廚欠一僧

致一齋述事

文書煙海困浮沉不覺盤跚百病侵
偶問客年驚我老忽聞鶯語歎春深
今朝麥粒黃堪麪幾日秧田綠似針
除却一犁春雨足眼前無物可關心

次韻楊同年祕監見寄二首

瘴雲嵐雨幾時歸，應把周南視九夷。
舊說鬼神驚落筆，新傳狐兔駭搴旗。
韶江石老簫音在，庾嶺梅殘驛使遲。
自古朱紱清廟具，莫貪鵬海看天池。

吾衰長愧接輿狂，忙裏何心領燕香。
塵土簿書憎鐵研，水雲蓑笠傲金章。
論文無伴法孤起，訪舊有情書數行。
何日却同湖上醉，露幃宵幄為君張。

曉起信筆

午枕汗如洗曉櫛氣稍蘇
莎蛩試風露滿意鳴相呼
倦客感節物流光不躊躇
秋聲已如許殘暑何足驅
人言今歲熱迥與常歲殊
此理恐未然豈不知頭顱
年年有三伏日日非故吾
婆婆今尚可後當彌不如
病骨須一涼未暇惜居諸
坐來有清思西風搖井梧

送曾原伯運使歸會稽用送徐叔智韻

秧田水滿麥棲畝勸農使者翩然去
去年愁苦救荒時豈敢夢為今日歸
天津橋西官柳陌文書燈火長相覓

江山信美不留人
寂寞回潮工送客
鏡湖一曲浙河東
萬頃太湖蓑笠翁
願賡四愁作五詠
我所思兮思剡中
王南卿母挽詞

櫛縱稱純孝
筭珈蚤隱憂
病中心已化
身外世如浮
聞道悲風木
誰能駐壑舟
佳兒行古道
足以賁潛幽

次韻鄭校書參議留別

年豐方共慶歲晚客他之
吏事朝還暮人生合復離
江山殘夢破風月片帆移
後會吾衰矣桑榆一繭絲

重九賞心亭登高

憶隨書劍此徘徊投老雙旌重把杯
綠鬢風前無幾在黃花雨後不多開
豐年江隴青黃徧落日淮山紫翠來
飲罷此身猶是客鄉心却附晚潮回

寄題王仲顯讀書樓

嗜書如嗜酒知味乃篤好欲辨已忘言
不為醒者道使君青箱家文史衰懷抱
平生名教樂雙旌不滿笑忽來雪溪興
來樣秦淮棹丘亭客漂泊夜夜短檠照
人云太

癡絕我自斲輪妙今朝檣竿起昨夢繞閤皂云有百尺
樓歸寄北窓傲滴露紉朱黃拂塵靜緗縹想當呻畢時
寧復羨騰趨古心千載事俗眼詎能料蕭灘富還往取
友必同調一張復一弛釀秫助歌嘯

菊樓

金陵出一種菊甚高圍丁
結成樓塔或至一二丈

東籬秋色照疎蕪挽結高花不用扶
淨洗西風塵土面
來看金碧萬浮圖

北門覆舟山道中

苒苒霜風掠弊貂簿書塵外訪漁樵
林煙色淡如濛雨塘水痕深似落潮
鴈字江天間塞管梅梢山路欠溪橋
騎驢索句當年事歲暮騷人不自聊

送郭明復寺丞守蜀州

士進固未易退亦良獨難西州多故人
歸路常險艱有道獨行意郭舟若神仙
勿輕銀兔符傾倒金貂蟬唐安君昔遊
百萬蠲逋錢我亦常客夢醉歌采菱船
父老尚相記况君有前緣想見東西湖
恩波漲春瀾此地著經

濟紗籠相後先潭潭相業堂新題我所刊政為來者地
君行豈偶然去去進明德後日五四賢

元日謁鍾山寶公塔

雪後江臯未放春老來猶駕兩朱輪歸心歷歷來時路
官事驅驅病裏身未暇雞窠尋古佛且防鶴帳怨山人
君看王謝墩邊地今古功名一窖塵

元日馬上二絕

泥絮心情雪樣髯詩囊羞澁酒杯嫌年來萬事都消減

惟有牀頭歷日添

筋骸全比去年非
騎吹聲中憶釣磯
待得江風欺老病
何如閒健一蓑歸

春晚

荒園蕭瑟懶追隨
舞燕啼鶯各自私
窓下日長多得睡
尊前花老不供詩
吾衰久矣雙蓬鬢
歸去來兮一釣絲
想見籬東春漲動
小舟無伴柳絲垂

北窓偶書呈王仲顯南鄉二友

官居故偏仄北窓誰所開胡牀憇午暑簾影久徘徊高
槐忽低昂知有好風來須臾墮几席篆香小飛灰病翁
亦披襟月露裛奇懷攏頭暴背耘永晝婦子偕不辭夢
山裂田水如潑醅去年豈堪說稻根已浮埃使君坐侯
宅窓間即涼臺何敢訴苦熱灑然助心齋

中秋清暉閣靜坐因思前二年石湖四明賞月
前年銀界接天迷去歲金盤湧海低漂泊相逢重一笑
秦淮東畔女牆西

玉麟堂會諸司觀牡丹醖醖三絕

東風微峭護餘春
紅紫香中酒自溫
不用忙催銀燭上
醖醖如雪照黃昏

洛園姚魏碧雲愁
風物江東亦上游
憶起遨頭八年夢
彭州花檻滿西樓

莫向花前惜酒杯
一年一度有花開
浮生滿百今強半
歲歲看花得幾回

重九獨坐玉麟堂

江上西風動所思又將清賞負東籬年年客路黃花酒
日日鄉心白鴈詩籠月秦淮無舊曲馳煙鍾阜有新移
人生笑口真稀間況值官忙閔雨時

次韻舉老見嘲未歸石湖

半世吟客舍柳長年憶後園花為報廬山莫笑雲丘今
屬誰家

次韻曾仲躬侍郎同登伏龜樓二絕

帶束江淮翠岫圍掌窺臺殿碧麟差劉郎句裏登臨眼

壓倒三江二水詩

古來遊客謾西東
領會誰如我與公
露坐繩牀天不盡
絕勝簾雨棟雲中

題李雲叟畫軸兼寄江安楊簡卿明府二絕

蒼煙枯木共荒寒
籬落堤灣洶漲湍
歸路宛然歸未得
閒將李叟畫圖看

新圖來自雪邊州
皴石枯槎筆最遒
明府能詩如此畫
為渠題作小營丘

晨出蔣山道中

霜痕如雨沁東郊，樂歲家家一把茅。
故國丘陵多麥壠，新晴籬落有梅梢。
小山何在應招隱，北嶺如今已獻嘲。
歸計未成聊琢玉，飄飄風袖作推敲。

有感今昔二首

陽春白雪雅音希，俚耳冬烘笑嗤麋。
見麗姬翻決驥，烏聞韶樂却憂悲。
爛奚輕薄人何敢，伏臘荒唐自不知。
蚓竅蠅鳴莫嘲誚，彭亨菌蠢正當時。

飄風驟雨謾驚春
埽蕩何煩臂屈伸
天職不衷宜不怒
神歆非類即非仁
休憚地下枯魚骨
且關尊前健犢身
靜看可憐還可笑
香山寧是章災人

種竹歎向在成都
種竹滿西園
偶苦寒疾數月來
金陵復種繞池未幾
以眩卧閣家人子遂謂予不
當種竹其說甚可怪歎口占此詩

宣華種萬竿
寒疾適相值
玉麟種千竿
偶復須藥餌
僮奴奴今昨
競道竹相崇
如將聖作狂
似以儒為戲
此君

來聲冤林神亦短氣我夢不平鳴霍然推枕起明當還
石湖賸種千畝地未論比封君且用執譏喙

公退書懷

昨者騰章奏發倉今茲飛檄議驅蝗四無告者僅一飽
七不堪中仍百忙皦日自能臨俯仰浮雲寧解制行藏
求田問舍亦何有歲晚倦遊思故鄉

石湖詩集卷二十二

石湖詩集卷二十三

宋 范成大 撰

初秋二首

急雨過窓紙新涼生簟藤蹒跚老鈴下來炷壁間燈
壯歲故多病老年知不堪何須看公案只此是真參

蝙蝠

伏翼昏飛急營營定苦飢聚蚊充口腹生汝亦奚為

蛩

壁下秋蟲語一蛩鳴獨雄自然遭跡捕窘束入雕籠

四花

素馨間末利木犀和玉簪醫來都屏去頭眩怕香侵

謝範老問病

三椽一席度秋冬造化兒嬉因此翁帖有王書難治眩
文如陳檄不驅風骨枯似枿膚如腊髮織成羶鬢作蓬
點檢病身還一笑本來四大滿虛空

二偈呈似壽老

法法剎那無住云何見在去來若覓三心不見便從不見打開

孟說所過者化莊云相代乎前何處安身立命飢餐渴飲困眠

諾惺菴枕上

噩夢驚回曉枕寒青燈猶照藥爐邊紙窓弄色如朧月
又了浮生一夜眠

癸卯除夜聊復爾齋偶題

五夜燈花重東風角韻來雪慳衣未纈春早句多梅寂
歷羅門亞溫曆藥鼎煨老嫗新歲換病喜舊星回鬱壘
先題版屠蘇後把杯書扉無健筆爆竹有寒灰餽牒牙
難膠椒盤眼倦開陳人仍憊卧身世兩悠哉

甲辰人日病中吟六言六首以自嘲

攢眉輒作山字啾耳惟聞水聲人應見憐久病我亦自
厭餘生

目慌慌蟻旋磨頭岑岑鰲負山筆牀久已均伏藥鼎何時丐閒

政爾榮枯衛蒞剛云人厄天窮歸咎四衝臨歲乞憐九曜過宮

復吉既愆七日泰來惟候三陽厯日今頒寅正占星更候農祥

有日猶嫌開牖無風不敢上簾報國丹心何似夢中抵掌掀髯

壯歲喜新節物老來惜舊年華病後都盧不問家人時
換瓶花

正月九日雪霰後大雨二首

夜霰三更碎瓦晝冥一陣翻盆賴是梅花已過不然皴
玉誰溫

黃昏簷溜垂瀑清曉屐聲滿門湖光萬頃何似小沼先
吹穀紋

正月十日夜大雷震二首

阿香真是健婦夜半鼓行疾驅直恐南山破碎絕憐窓
紙枝梧

人言有物司鼓春到揚桴發聲但要蟄蟲啟戶何須一
許震驚

吳燈兩品最高

鏤冰影裏百千光剪綵毬中一萬窓不是齊人誇管晏
吳中風物竟雙雙

燈夕懷廣蜀舊事

灘水橋西列炬香少城樓下變燈忙兒嬉萬里客程遠
老懶一龕春夢長

上元紀吳中節物俳諧體三十二韻

斗野豐年屢吳臺樂事并酒爐先疊鼓

歲後即旗亭先擊鼓不已以迎

節意燈市蚤投瓊

臘月即有燈市珍奇者數人酥買之相與呼盧米勝者得燈

價喜膏

油賤祥占雨雪晴篋當仙子洞

坊巷燈以連枝竹縛成洞門多處數十重

筵

笛化人城

蓮花燈最多

檣炬疑龍見

舟人接竹柁檣之表置一燈坐之如星

橋

星訝鵲成

燈橋

小家厖獨踞

犬燈

高閑鹿雙撐

鹿燈

屏展輝雲

母

琉璃屏風

簾垂見水精

琉璃簾

萬窓花眼密

萬眼燈以碎紅白相間砌成

工夫妙天下多至萬眼

千隙玉虹明

琉璃燈每一隙映成一花亦妙天下

簷葡萄丹

房挂

燈梔子

葡萄綠蔓紫

葡萄燈

方縑繙史冊

生絹糊大方燈圍畫史冊

故事村人喜看

圓魄綴門銜

燈月擲燭騰空穩

小毯燈時推毯滾

地輕

大滾毯燈

映光魚隱見

琉璃壺瓶貯水養魚以燈映之

轉影騎縱橫

燈輕薄行歌過顛狂社舞呈

民間鼓樂謂之社火不可忘記大抵以滑稽取笑

村田蓑笠野

村田樂

街市管絃清

街市細樂

里巷分題句

每里門作

長燈題好句其上

官曹別扁名

官府名額多以絹或琉璃照映旱船遙似泛

陸行為親渡之樂謂之划旱船水偶近如生水戲照鉗赭衣牢戶獄嘲

嗤繪樂棚山棚多畫一時堵觀瑶席臨喝道綺叢爭禁

鑰通三鼓歸鞭任五更桑蠶春繭勸春繭自臘月即入食次所以為蠶事

之花蝶夜蛾迎大白蛾花無貴賤悉戴之亦以迎春物也鬼子描丹筆紅畫

相餽遺戴毛剪雪英剪戴毛為雪花與夜蛾並戴寶糖珍粒粒女餽拍吳中謂之

寶糖餽特為脆美烏膩美飴烏膩糖即白飴俗言能去烏膩撚粉團樂意子

熬穉膈膊聲炒糯殺以下俗名字筵筭巫志怪香火婢

輸誠俗謂正月百草靈故帶草針其第卜拖裙繫弊帋

以上名
婦帚姑

箕詩落筆驚

即古紫姑今謂之
大仙俗名箕姑

微如針屬尾

以針

姑卜伺其尾相
屬為兆名針姑

賤及葦分莖

葦莖分合為
卜名葦姑

末俗難訶止

佳辰且放行此時紛僕馬有客靜柴荆幸甚歸長缺居
然照短檠生涯惟病骨節物尚鄉情倚撫成俳體咨詢
逮里忙誰修吳地志聊以助譏評

雪寒探梅

酸風如箭莫憑闌凍合橫枝雪未乾吳下得春元自晚
那堪天與十分寒

金定四庫全書
卷二十三
曉枕三首

煮湯聽成萬籟添被知是五更陸續滿城鐘動須臾後
巷雞鳴

卧間赤脚鼾息樂哉栩栩遽遽病夫心口相語何日佳
眠似渠

舒慘常隨天氣關心窓暗窓明日晏扶頭未起喚人先
問陰晴

不寐

春宵似暖非暖曉夢欲成未成風竹時驚雀噪月窓誰
伴梅橫

戲書二首

長病人嫌理亦宜吾今有計可扶衰煩君昇著山深處
恐有黃龍浴水醫

羣兒欺老少陵窮口燥脣乾髮漫銜顛沛須臾猶執禮
古來惟有一高共

耳鳴

風號高木水翻洪
歷歷音聞不是聲
一任大千都震吼
便從卷葉證圓通

案上梅花二首

南坡玉雪萬花園
舊約東風載酒看
冷落銅瓶一枝亞
今年天女亦酸寒

地爐火煖日烘窓
一夜花鬚半吐黃
鼻觀圓通熏百和
博山三夕罷燒香

古梅二首

孤標元不闌芳菲雨瘦風皺老更奇壓倒嫩條千萬葉
只消疎影兩三枝

誰似西湖處士才詩中籬落久塵埃陸郎舊有梅花課
未見今年句子來

至昌為具賞東軒千葉梅然梅尚未開

玉葉重英意已芽新移竹外小橫斜東齋何似春工晚
鐵樹已花梅未花

喜周妹自四明到

團樂話裏老龐衰一妹仍從海浦來孤苦尚餘兄弟樂
如今雖病也眉開

占星者謂命宮月孛獨行無害但去年復照作災
及今年正月一日已出而歲星作福戲書二絕

昔躔初度本除災何意重逢作病媒久住靈旂今日過
歷翁歡喜勸椒杯

暗曜加臨有救神煌煌福德自天仁只煩終惠蘇殘喘
官爵從渠奉董秦

題藥方

孤童亦復夢槐柯無德無功用福多天理乘除當老病
巢源王訣奈君何

園丁折花七品各賦一絕

單葉御衣黃

舟前鸞羽映酒塞上駝酥截肪春工若與多葉應入姚
家鴈行

水精毬輕盈嫵媚不耐風日

又名醉西施又名
風嬌又名玉勝瓊

縹緲醉魂夢物嬌饒輕素輕紅若非風細日薄直恐雲
消雪融

壽安紅深色粉紅多葉易種且耐久

豐肌弱骨自喜醉暈粧光總宜獨立風前雨裏嫣然不
要人持

疊羅紅開遲旬日始放盡

襞積剪裁千疊深歲愛惜孤芳若要韶華展盡東風細
細商量

崇寧紅

勻染十分艷絕當年欲占春風曉起粧光沁粉晚來醉
面潮紅

鞞紅

猩脣鶴頂太赤榴萼梅腮弄黃帶眼一般官樣祇愁瘦
損東陽

紫中貴

沉沉色與露滴滴香隨日烘滿眼艷粧紅袖紫綃終

是仙風

聞春遠牡丹盛開

東軒聞道有花開
癡坐三椽首謾回
縱得好晴猶懶看
那堪風雨揭天來

蜀花以狀元紅為第一
金陵東御園紫繡毬為最
西樓第一紅多葉東苑無雙紫
壓枝夢裏東風忙裏過
蒲團藥鼎鬢成絲

喜雨

昨遣長鬚借踏車小池須水引鳴蛙今朝一雨添新漲
便合翻泥種藕花

嘲風

紛紅駭綠驟飄零癡騃封姨沒性靈報道海棠方熟睡
也須留眼為渠青

大風

春晴雖好恨多風到眼花枝轉眼空晴不與花為道地
爭如雲淡雨濛濛

風止

收盡狂飈捲盡雲一竿晴日曉光新
柳魂花魄都無恙
依舊商量作好春

苦雨五首

河流滿滿更滿檐溜垂垂又垂皇天寧有漏處后土豈
無乾時

不辭蛾化麥穗叵忍秧浮浪花兒孫汨汰護岸翁媪扶
攜上車

折筍肥梅飮坐涎蝸鬪蟻上梁雨工莫賈餘勇留待稻
花半黃

潤礎纔晴又汗濕薪未爆先煙壯夫往往言病病叟岑
岑且眠

已厭衣裳蒸潤仍憐書畫爛斑匳香尚餘幾所盡付熏
鑪博山

謝龔養正送蘄竹杖

一聲霜曉謾吹愁八尺風漪不耐秋上座獨超三昧地

諾惺菴裏證般舟

釋氏謂常行為般舟三昧

寄題祝郢州白雪樓

楚望風煙倚繡楹使君靜治有高情祇應襦袴新翻曲
壓倒當年寡和聲

夏至二首

李核垂腰祝饀粽絲繫臂扶羸節物競隨鄉俗老翁閒
伴兒嬉

石鼎聲中朝暮紙窓影下寒溫踰年不與廟祭敢云孝

子慈孫

重午

熨斗薰籠分夏衣
翁身獨比去年衰
已孤萬歲十分勤
却要艾黃千壯醫
密粽冰糰為誰好
丹符綵索聊自欺
小兒造物亦難料
藥裏有時生網絲

積雨作寒五首

壓屋雨雲晝暗環
城霖潦夏寒西池半沒荷
柄南蕩平
沉炎盤

已報舟浮登岸更憐橋塌平池養成蛙吹無謂埽盡蚊
雷却奇

熨帖重尋毳衲補苴盡護紙窓餘生雪鬢禪榻昨夢雲
帆漲江

婢喜蚊僵霧帳兒嗔蝸篆風櫺兀坐鼻端正白忘懷眼
底常青

山寒禪老不下泥滑琴僧罕來且喚園丁閒語喜聞湖

岸未頽

禪老範默堂琴
僧淨月師也

喜晴二首

驅帶水爭溝口卷簾日歎屋山飢燕癡兒呌怒拙鳩去
婦復還

窓間梅熟落蒂牆下筍成出林連雨不知春去一晴方
覺夏深

子文大丞重午日走貺煮酒清甚殆與遠水一色
何其妙哉作數語奉謝

臘脚清若空吾聞其語矣今晨品蟻尊公酒正如此太

常家有此段奇銷得不齋醉如泥但恨今無遏雲曲送

我葛蒲一杯綠

子文舊有歌者名遏雲

子文見和云亦有小鬟能度曲復用韻戲贈

三年屏杯酌甚矣吾衰矣眼中有溜澁猶解商略此花
酒俱來事更奇不妨禪心絮沾泥翠眉何時真度曲細
意煩君畫蛾綠

石湖詩集卷二十三